

سفر

چھوچھی نارکو کو کرو پھیکو سف ایہہ او پھیتانی۔ ملگیری لنگر آبادو دورا جمع ہونی۔ بسی بیٹی راہی بیکو لنگر آبادو نان بتیتان موخا نسیٹائے۔ نان دودیریا پت بتیتان پارویزاو بغائے۔ سوروم خان گوردوغو باتینہ چوکی وا لنگر آبا اوچے وشی اچہ دیکئیٹاؤ اف راہی ارینی۔ لنگر آبادو شک دورو روئے پرویزی دوروتے بغانی مگم لنگر آبادو نن درونگار لوژی روپھی بہچیتائے۔ لنگر آباد اچی غیستی بیٹی اشارو سورا خدایار کوراو بوغاو اوشوئے۔ بے موژی ناگہان خوخان موژی تھرشکئیکو ہواز ہائے۔ ہرونہ سف ٹھک دیتی رو پھیتانی۔ غیچہان ژاپھئیے ژو ائی نیسی راہہ دیکو سوم ژوو، ژوو رے سف قوژد ارینی۔ ہوازا لنگر آبادو نانو کارا دی پرائے۔ سف خوشان ہونی ژوو موخہ ہائی، سفر موخ دوئے رے۔ اشارو سورا لنگر آباد دی نوتین ژوو موخہ گیکو مسقرویو پرائے۔ نن خوشانیو سورا دوروت راہی اریر۔ ژوو موخہ گیکو خوشانیہ تان موژی مشقول باو راہی ارینی۔ ای کما غوزا ر لکھی استانی وشلو پونگ اوغو موژو دیتی چھڑتاق ہوازا اریر۔ پونگ زاہ ہوئے بے موژی لاژینیان کہ اُغ کو چہار نیسی پھوک ژویا دیتی دو چہارا ہائے۔ سف خوشان ہونی کوریکو اُغ دی موخہ ہائے ژوودوچہارا ہائے ہمیت سف سفرو بچن جم نیسانی۔ سف خوشان بیٹی پروشٹی راہی ارینی۔

مگم وشلو ای پونگ زاہ بیٹی اوشوئے وا ای پونگ چھو چھو تان اوشوئے۔ لنگر آباد یکدم بتوتے ریتائے " بو غے اچی بی ای پونگو دی خاہ کوری گئیے، کوریکو ای پونگ زاہ ای پونگ چھو چھو کی بہچیتائے نن بریور۔ وشی اچی بی ای پونگو دی خاہ کوری ہائے۔

ژاوو پرویزیکار اچی لنگر آبادو نن اچی غیستی اچی غیستی لوژاو تان دووری اوتیتائے۔ تیز قفہ اوژین کوری بییری بوئیکرانتے اولیتائے۔ سفرو سورا خدائی رئے اچی دوورو رویانتے ہدایت اریر کہ نگہہ کا اُغ بییری اولیمی خور گوسون دی مو مژور۔ دوراری کا سفروت کی نیسانی ای مُدا پت ہمی کورمان مُدائی توریکا پت نوکورونی رے خیق سو لوٹانے ہدایت اریر۔ بیغار اچی دورو روئے سف تان تان کورما چوکیتانی۔ لنگر آبادو نن تان چخرو نسہ بغائے۔ چخرو نسہ تھسوروک درو درے اوشونی۔ تھسوروک دران چھتری دیتی شوو بچن گئیک شروع اوشوئے۔ دوری ای خیق جو دانہ تھسوروک دران ہوستہ کوری اشوکیاوا استائے۔ بیتان پی گنی اف پیچھیتائے۔ خیال ہموس اریر کی ناگہ بے حیق بیتان موژو اُف کی کاردو بیرائے شوتور چھیونی بیغین دیتی تروئی چھور دانان ضایع اریر کوریکو اُف کاردو تھسوروک درا شوتور چھیور۔

لنگر آباد اوچے تو ملگیری چھور پونج بس پونو سفرو کوری تان منزلہ توریتانی۔ دوراری الدو اشناریان جم نرخہ سودا ارینی۔ اچی دوروت انگیکو اشناریان بچن ای بیٹی جم دونیتانی۔ شک ملگیری تان بچین پھوک پھوک ضرورتو اشناریان گنیتانی۔ پھوک کیہ سامان کی اوشونی بیتان بچن گو گہت پولتہ (ماچس) تروپ، گوگہت خور پالوم سامان گنیتانی۔ لنگر آباد پھوک زیاد تروپ گنیکو کوشش اریر مگم ہانی تروپ کورا بدست نو ہوئے۔ شک ملگیری تان کم ضرورتو پورا ارینی۔ نماز دیگر معلوم ہوئے کہ ہنون چھوئی برابارا تروپ خچیران سورا پی ترونی۔ بیغین دیتی انتظارا بہچیتانی۔ ای بس خور ملال بیکو تروپان خچیران سورا تریتانی۔ لنگر آباد تانتے ثخت تروپ گنیتائے۔ آخر سودا پورا ہونی روشتی شیپ نا شپی اوشوئے وشی دی پھوک سامان گنیتائے، سوروم خان لنگر آبادو سامانن گوردوغوت بار اریر۔ ویلاغبیلو بیرارونجی روشتی راہی ارینی۔ پوندی دی ای حصہ ختم بیٹی اوشونی۔ سامانن موژی کرواسی زاپ غار، سان چالیغار، گڑاک، تروپ، نبت مصری شکھور وا روشت کوریکو بچن دوو دار وا خور سامان اوشونی۔ اولاغو نست کوری دورو وسکی راہی ارینی۔ لنگر آبادو نوغ وا ضروری گنیرو اشناری ای بوتھالہ جھوتیو تیل وا ای دیوا اوشوئے۔ جم لوژی حاکے پولتا نیزی گنی استائے وا بو حفاظتو سورا سامانن موژا لکھی استائے۔ بتو سار بو احتیاط کوراو اوشوئے کوریکو ہیہ اشناریو پروشٹی کا نو انگیتی استانی۔